



Author: Dr. R. L. Shant

Reviewer	Review Date	Status
Vishal Kachroo	2024-09-19	In progress ▾
		Not started ▾
		Not started ▾
		Not started ▾

अफसानु: ऑनख

रतन लाल शान्त

बस युथुय सिरीनगर शहरस त्रायि,सु ह्योतुन बेकरार
गछुन, सु छु गरा दॅछिन्य तय गरा खोवर्य दार्यव किन्य
वुछान। खबर क्याहताम छांडान, परजनावनयच कूशिश

करान, खबर क्याहताम लबनु खॉतरहि पनयनि ज़ लर्यव
बाज़रव दुकानव तस वति पकविन्यव लूकव पेठय तेज़-तेज़
फिरनावान। अँमिस दँछिन्य खोवर्य सवारि आसु बज़ॉहिर
अँम्य सुंद यि मच़र वुछिथ केंछाह हॉरान तु केंछाह तंग
आमच़ मगर तिमव आसिहे यिति च्यूनमुत ज़ि नफर छु या
तु वारियुह काँल्य या ग्वडनिचि लटि कँशीरि आमुत। तिमु
आसहॉन दपान मु कॅर्यूस केंह, पननिस काँसि आसि वँन्य
दिवान। तिमव आसिहे यिति वुछमुत जोमि प्यठु योत ताम
ओस यि दोह्य दूहस छवपु कॅरिथ तु बेहरकथ बिहिथ। न
कॅरन काँसि सुत्य कथय न वोथ सीटि प्यठु ब्वनय ज़ांह।
काँसी वोनुस न केंह।

अँती दिच़ तँम्य बडि हटि ड्रायवरस क्रख - रुकाव
साँ व्वस्ता, मै त्राव साँ येती।

सु गव यखदम बसि प्यठु ब्वन वॅसिथ तु गव अँकिस
पी-सी-ओ दुकानस खँसिथ। पांचन दँहन मिनटन कॅरन
फोन करनच कूशिश, मगर नम्बर ओसुस नु रलान। किन ु
रलान ओसुस ति सुय ओस च़टान? अख कथ ति कॅरन नु।

तँमिस गँयि कनन आवाज़ मैटाडोरुक (सिटी बसि
हुंद) कंडक्टर ओस हख दिवान - रयन्यवोर, रयन्यवोर...

व्वन्य गव सु हुशार हयू। सु ह्योतुन दुकान प्यठु ब्वन
वसुन। दुकानदारन होवुस फोनकिस मीटरस कुन इशारय।
तँम्य कजि रवपयि च़तजी कौंटरस प्यठु त्राँविथ गव ब्वन
वॅसिथ तु स्योदुय गव रयन्यवॉर्य मैटाडोरस खँसिथ।

मैटाडोरस मंज़ ति ह्योक नु सु कचि बिहिथ। बेयि छु
तिथय कँन्य सीटय प्यठु वँथ्य वँथ्य गछान तु दँछिन्य खोवर्य
दार्यव किन्य वुछान। ओवरलोड खडा सवार्यव मँज्य कलु
कँडय कँडय ति सीटन प्यठु बिहिथ सवार्यन प्यठु नोम्य

नोम्य। शायद ऑस मैटाडोरस मंज़ न काँसि फुर्सथ न ओस
काँसि परवाय जि यि नीम बुज़र्ग क्याह वति वति शुर्यन
हंघ पॉठय वोथ्य वोथ्य गछान।

अँती दिचन आँघकी पॉठय ड्रैवरस बडि क्रख -
व्वस्ता, लोतय पहान। मे त्राव साँ येती।

यिथु कँन्य बडि क्रख बूजिथ दिच ड्रैवरन यखदम
ब्रेक। सु वोथ थोद तु गव सवार्यव मँज्य व्वन वँसिथ। सु
खॉली बैग त्राव्योन गाडि हंजि बीरि बीरि मंजय, युस गरि
नेरनि विजि दूहय फेकिस अलोंद त्रावान ओस। पँत्य किन्य
लॉयिस कँम्य ताम क्रख ति बैग द्युतनस दॉरिथ, युस तँम्य
दूशिवन्य नर्यन प्यठ रोट।

सु त्राव अँकिस कोचस तु छु पकान।

सु छु पकान, रुकान तु कुनि मकानस ब्रॉंह कनि
खडा गछान।

सु छु कुनि दुकानस खसान, दुकानदारस थलि थलि
वुछान। दुकानदार येलि इशारस मंज प्रछान छुस क्याह
गछी, सु छु मोयूस ह्यू गॅछिथ वानु प्यठु ब्वन वसान कदम
दिवान।

सु छु तिमन तंग कोचन ति अचान यिमन अमि
विजि खालय कांह पकान आसान छु।

सु छु तिमन बाजरन मंज खडा गछान येति व्वसु
द्रव्सु तु बीरु छे तु दकु सुत्य छु सु गरा दॅछिन्य ति गरा
खोवर्य लायिनु यिवान।

अँती गयि तँमिस कनन फोनच रिंग। सु गव अँकिस
नजदीकी पी-सी-ओहस खँसिथ। टेबलु प्यठु तुलुन अख
रसीवर तु लोगुन कनस। वानुवॉल्य होवुस इशारु सुत्य चंदस
कुन जि रिंग छय मोबाइलस गछान। हॉरॉनी मंज फॉलेयि
हिशि तँमिस बुमु। दँस्ती कोडुन चंदस अँदर फोन तु लोगुन

कनस - हैलो।तँम्य परज़नाँव आवाज़। यि आँस अँमिस
ज़नान बोलान।

... हे चु कति साँ छुख। फोन क्याज़ि ओसुय बंद
थोवमुत। डायल करान करान आयम आँगजि गसनु। मेय
वोनमुत ओसमय अज़ यिज़ि सूली पहान। गरि नीरिथ छुय
नु च़े पतु गरच<æ> यादय रोज़ान ... यिमन आव नु कुकू
जी वुनि ति गरु वापस। कोलन हसॉ। पंदाह गंटु गँयख तु
वुनि छुख नु किंही ननान। ज़न तु वु<ि{Lç> गव बिचोर।
मँहँल छु सम्योमुत। पुलीस ति आव बेयि छुयि यादय,
अपॉरी गँछिज़ि आँनकु वॉलिस ज़रूर तु काकनि हुंद आँनख
हेज्यस.....

सु प्यव ज्वनस। आ काकनि ओस सुबहनस आँनकु
वरॉय आंगनस मंज़ दब लोगमुत।...हमसायन ओस लँडकु
राथ शामु प्यठु गॉब।

अँती पेयि तँमिस पानस प्यठ नज़र। बैग फ़ैकिस
त्रॉविथ द्रायोव सु सुबहस गरि ... अज़ ति द्वहदिशिक्य
पॉठय ... अमा सु कोत वोतमुत...

सु छु अँद्य पँख्य नज़र त्रावान। सु छा तोतुय वोतमुत
योत सु द्वहय गछान छु किनु कोत।... तस हेतिन कनन
अंदर ज़नानि हंुद्य यिम लफज़ु ग्रजन्य ... पंदाह गंटय ...
क्याह तस गँया पंदाह गंटय गरि द्रामतिस - पंदाह गंटय
गँया तस ... यथ मँहलस, यिमन कोचन बाज़रन तु लूकन
ताम वातनस, यिम नय तस परज़नावानय छि ... न न
पंदाह गंटु गँयि कोल हंदिस कुकू जियस ... मगर पानु कोत
आव सु योर... क्याह करनि क्याज़ि ... किनु ... यि मा छु
... हांह ..

तँमिस ह्योतुन चकर युन। सु ब्यूठ वानु पँजि अँकिस
प्यठ।

तँम्य दिच्च पानस दुनन। व्वन्य ह्योतुन गोरु सान
च्चवापौर्य वुछुन। सु कति छु वुन्यकिस। मगर तँमिस पय
छे। सु अय यिमन सारिनय लुकन ज़ानि... यिमन क्या सना
गोमुत... तस कुन न वुछानयकांह... ज़न नु ज़ाननुसय...

तँम्य छुन चंदस अथि। अति आस नु ऑनख अथी।
सु आसि मैटाडोरस मंज़ प्योमुत। दप्योन वारु वुछख तु बदि
कडख यिम अकि अकि ... ह्यौवु ...

तँमिस पेयि हंगु तु मंगु अँकिस नॉरस कुन नज़रु,
युस अँमिस ब्रूठय किन्य नस्ति स्योदुय द्राव। तँमिस
बासेयस द्वशिवुन्य अँछन अंघ अंघ ज़न ित ज़ून पेमच्च।
आरु क्वंडल हिव्य ऑसिस। जन ति शीशव रोस्त ऑनख
लोगमुत ओसुन। व्वन्य वुछ तँम्य बेयिस नफरस कुन। तस
ति बासेयस यिथि आरु क्वंडल अँछन पेमत्य। ज़न ति
ऑनख। बेयिस ति बेयिस ति... यि क्याह सारिनुय ज़न

बदलय आँख हिव्य लाँग्यमुत्य। यिमव किन्य मा छिनु यिम
वुछानुय केँह.. किनु तँमिस छु नु पानुसुय आँनकु वरॉय
लबनु यिवान केँह...

तँम्य दोप यि गॉयि म्यॉन्य हालथ तु काकुनि क्याह
वँनिजि... ओह काकन्य... ओह कुकूजी....

तँमिस हेतिन व्वन्य आँरख फटुन्य। व्वन्य कपॉर्य
नेरि येमि बाज़रु न्यबर। दोपुन प्रछना काँसि, मगर कस।
तँम्य त्रोव व्वश... वाह्य, संघा वख ह्योतुन वातुन... ज़नानि
हंज़ कथ आँसुस कनन अंदर ग्रज़ान... गरि नीरिथ छय नु
गरच यादुय रोज़ान।

तँ मे वचि अँछ ... भगवानु मे वातुनावतु कुनि पाँठ्य
गर।

